



Bosnia and Herzegovina
Federation of Bosnia and Herzegovina
CANTON SARAJEVO
Ministry of Labour, Social Policy,
Displaced Persons and Refugees

Broj: 13-03/1-04-53531-27-1/24
Sarajevo, 12.03.2025. godine

SKUPŠTINA KANTONA SARAJEVO

Služba za skupštinske poslove

- O v d j e -

KANTON SARAJEVO

Stručna služba Vlade

- O v d j e -

Zastupnica Mimirka Melank je na 18. Radnoj sjednici Skupštine Kantona Sarajevo, u okviru tačke Dnevnog reda „Poslanička/zastupnička pitanja, inicijative i odgovori“, a u skladu sa Poslovníkom Skupštine Kantona Sarajevo, uputila slijedeću zastupničku inicijativu za:

”

- 1. Proširenje kapaciteta postojećeg prihvatilišta za djecu, koje djeluje u okviru KJU Dom za djecu bez roditeljskog staranja Sarajevo.**
- 2. Uspostavljanje usluge prihvatilišta kao kriznog smještaja za djecu žrtve nasilja i trgovine ljudima na nivou kantona.**
- 3. Donošenje multisektoralnog kantonalnog Protokola za prevenciju i postupanje u slučajevima prosjačenja i drugih oblika eksploatacije djece u Kantonu Sarajevo, sa pratećim Hodogramima za postupanje za sve nadležne institucije u sistemu zaštite djece u Kantonu Sarajevo po modelu dobre prakse koji je primjenjen u 34 lokalne zajednice u Bosni i Hercegovini.**
- 4. Osiguranje kontinuirane certificirane edukacije stručnih osoba iz JU Kantonalni centar za socijalni rad Sarajevo, uključujući općinske službe socijalne zaštite, te policijskih službenika, za rad sa djecom i maloljetnicima u krivičnom postupku, u saradnji Ministarstva za rad, socijalnu politiku, raseljena lica i izbjeglice Kantona Sarajevo, Ministarstva unutrašnjih poslova Kantona Sarajevo i Federalnog ministarstva pravde.**
- 5. Organiziranje javne kampanje za suzbijanje prosjačenja i podizanja svijesti kod građana da ne daju novac djeci i odraslima koji prosjače, te informiranje javnosti o postojanju Mobilnog tima.**
- 6. Proširenje kapaciteta Mobilnog tima za prevenciju prosjačenja u KS.“**

ODGOVOR:

U Ministarstvu za rad, socijalnu politiku, raseljena lica i izbjeglice Kantona Sarajevo zaprimljena je gore navedena inicijativa zastupnice Mimirke Melank, a koja je sa pažnjom razmotrena u okviru ovoga ministarstva i ustanova socijalne zaštite sa područja Kantona Sarajevo,



Adresa: Reisa Džemaludina Čauševića 1, 71 000 Sarajevo
Tel: + 387(0)33 562-089, Fax: + 387(0)33 562-090
Web: <http://mrsri.ks.gov.ba>, E-mail: mrsri@mrsri.ks.gov.ba

1/3

JU „Kantonalni centar za socijalni rad“ (u daljem tekstu: Kantonalni centar) i KJU Dom za djecu bez roditeljskog staranja (u daljem tekstu: Dom za djecu bez roditeljskog staranja), te na istu dajemo slijedeće izjašnjenje:

1. Usluga Prihvatište za djecu u okviru Doma za djecu bez roditeljskog staranja uspostavljena je 2017. godine u skladu sa Planom transformacije Doma za djecu bez roditeljskog staranja. Prihvatište funkcionira kao rezidencijalna usluga socijalne zaštite 24h brige za djecu bez roditeljskog staranja u stanju socijalne potrebe koja se posredstvom Kantonalnog centra, odnosno nadležnih službi socijalne zaštite, smještaju u ovu ustanovu. U okviru Prihvatišta pruža se usluga koja podrazumijeva njegu, odgoj i obrazovanje djeteta, najduže do 3 mjeseca, odnosno do iznalaženja rješenja u najboljem interesu djeteta (povratak u vlastitu biološku porodicu ili srodničku porodicu, smještaj u hraniteljsku porodicu, smještaj u mali porodični dom ili drugu ustanovu). Kapacitet prihvatilišta je maksimalno 12 djece starosti od 5 do 18 godina. Međutim, zbog potreba službi socijalne zaštite često je u Prihvatištu smješteno i više djece nego je to predviđeno, te je i to jedan od razloga zbog čega Ustanova trenutno nije u mogućnosti proširiti kapacitete Prihvatišta za djecu. Naglašavamo da se djeca bez roditeljskog staranja u Prihvatištu zbrinjavaju najduže do 3 mjeseca, odnosno do iznalaska trajnog rješenja za smještaj u mali porodični dom ili u hraniteljsku porodicu ili neke druge opcije zbrinjavanja.
2. Nadležnost u oblasti borbe protiv trgovine ljudima ima Ministarstvo sigurnosti Bosne i Hercegovine, a smještaj žrtava trgovine ljudima realizira se na osnovu rješenja ovog ministarstva ili na osnovu naloga tužilaštva. Ministarstvo sigurnosti BiH u okviru svog Budžeta planira grant sredstva za nevladine organizacije koje upravljaju skloništima za zaštitu i pomoć žrtvama trgovine ljudima u Bosni i Hercegovini (strane i domaće). Nakon usvajanja Budžeta Institucija BiH i međunarodnih obaveza, Ministarstvo sigurnosti raspisuje Javni poziv za dodjelu grant sredstva u određenom iznosu na koji se prijave pomenute nevladine organizacije. Nakon provedene procedure razmatranja pristiglih prijava, te ocjene i izbora, navedeno ministarstvo potpisuje protokol sa izabranim nevladinim organizacijama. Nažalost, ova procedura ovisi od usvajanja Budžeta BiH, te u ovom trenutku ne postoje važeći protokoli. Međutim, Ministarstvo sigurnosti BiH ima pisane garancije od strane nevladinih organizacija koje su do sada pružale ovu uslugu, da će, bez obzira na trenutno nepostojanje protokola, oni nastaviti saradnju sa Ministarstvom sigurnosti i smještati, odnosno pružati usluge žrtvama trgovine ljudima.
3. Ovo ministarstvo snažno podržava sve multisektorske aktivnosti koje će rezultirati unapređenjem zaštite svih ranjivih kategorija društva. S tim u vezi, podržavamo i donošenje multisektorskih dokumenata koji tretiraju slučajeve trgovine ljudima, a posebno kada su žrtve djeca. S tim u vezi, smatramo značajnim informisati Vas da postoji Protokol o saradnji i postupanju u slučajevima protivpravnog ponašanja na štetu djece u Kantonu Sarajevo iz 2018. godine i Anex Protokola o saradnji i postupanju u slučajevima protivpravnog ponašanja na štetu djece u Kantonu Sarajevo iz 2019. godine, a koji su potpisani od strane relevantnih aktera ministarstava i institucija. Ovaj protokol je potpisan sa ciljem sprečavanja prosjačenja, skitnje, eksploatacije djece, kao i svih vidova zloupotrebe i protivpravnih ponašanja na štetu djece, te cijeneći da je prosjačenje prikrivena eksploatacija i da može imati elemente trgovine ljudima u svrhu pribavljanja materijalne koristi.
4. Stručni uposlenici Kantonalnog centra ne mogu poduzimati aktivnosti u radu sa djecom počiniocima ili žrtvama krivičnog djela shodno Zakonu o zaštiti postupanju prema djeci i maloljetnicima u krivičnom postupku FBiH ukoliko nisu završili propisane certificirane edukacije koje propisuje isti Zakon. S tim u vezi, u novembru 2024. godine su realizirane



Adresa: Reisa Džemaludina Čauševića 1, 71 000 Sarajevo
 Tel: + 387(0)33 562-089, Fax: + 387(0)33 562-090
 Web: <http://mrsri.ks.gov.ba>, E-mail: mrsri@mrsri.ks.gov.ba

certificirane edukacije za 65 stručnih uposlenika Kantonalnog centra koji navedenu edukaciju nisu ranije završili. Naglašavamo da u svakoj službi socijalne zaštite radi socijalni radnik koji je prošao ovu edukaciju. Međutim, imajući u vidu potrebu da što veći broj uposlenika Kantonalnog centra završu predmetnu edukaciju, Ministarstvo će zajedno sa Kantonalnim centrom komunicirati prema Federalnom ministarstvu pravde potrebu održavanja predmetnih edukacija za profesionalce.

5. Smatramo izuzetno značajnim na adekvatan način informisati građane Kantona Sarajevo o problemu prosjačenja i sistemu zaštite djece koja prosjače na ulicama našega kantona. Redovna saopštenja za javnost putem društvenih mreža, elektronskih i pisanih medija, distribucija promotivnih materijala sa jednostavnim i lako razumljivim porukama o zloupotrebi djece za prosjačenje, gostovanja profesionalaca na relevantnim tv i radio emiterima, najbolji su način da se građani Kantona Sarajevo informišu o prisustvu organiziranog prosjačenja u našem kantonu. Uposlenici Kantonalnog centra su uvijek, i u ranijem periodu ali i sada, koristili svaku priliku za informisanje građana Kantona Sarajevo putem sredstava javnog informisanja o temi prosjačenja u okviru nadležnosti ove ustanove i poslova koje kao uposlenici iste obavljaju. Ističemo nadalje da se aktivnosti informisanja građana trebaju provoditi multisektorski, sinhronizirano i koordinirano od strane Ministarstva unutrašnjih poslova Kantona Sarajevo, a uz učešće svih aktera koji tretiraju djecu i odrasle osobe koje prosjače na ulicama našega kantona.
6. Ministarstvo ima sluha za potrebe ustanova socijalne zaštite, a posebno u dijelu koji se tiče obezbjeđivanja ljudskih i materijalnih sredstava potrebnih za nesmetano funkcionisanje ovih ustanova. U tom smislu ističemo da je Ministarstvo u 2024. godini obezbijedilo vozilo koje je neophodno za rad Mobilnog tima, a što je predstavljalo dugogodišnji problem u radu istog. Što se tiče potrebe rada Mobilnog tima u dvije smjene, naglašavamo da takav prijedlog Ministarstvu treba da bude upućen i obrazložen zvanično od strane Kantonalnog centra. Sa druge strane, želimo Vas upoznati sa činjenicom da, iako Kantonalni centar nije ustanova koja radi u dvije smjene, postoji dežurni socijalni radnik koji je i poslije radnog vremena na raspolaganju institucijama sistema u slučaju potrebe za obavljanje poslova koji su u nadležnosti ove ustanove.

U konačnici želimo ponovo naglasiti da je pitanje trgovine ljudima oblast koja je u nadležnosti države Bosne i Hercegovine, a da se Kanton Sarajevo u okviru svojih nadležnosti uključuje putem različitih resora i daje svoj doprinos u borbi protiv trgovine ljudima i konkretnom tretmanu i zaštiti odraslih osoba i djece žrtava trgovine ljudima.

S poštovanjem,

Pripremila: Smaragda Lučkin, šef Odjeljenja
Kontrolisao: Miralem Dedović, pomoćnik ministra

Dostavljeno:
1. Naslovu,
2. a/a.



Adresa: Reisa Džemaludina Čauševića 1, 71 000 Sarajevo
Tel: + 387(0)33 562-089, Fax: + 387(0)33 562-090
Web: <http://mrsri.ks.gov.ba>, E-mail: mrsri@mrsri.ks.gov.ba

3/3